

Gosa? Zoya? Pordoná?

Ata nos ta bèk na e temporada tan sperá! Desde a kima rei Momo aña pasá, a kuminsá plania p'e proksimo karnaval. Ora aña a bòlter, preparashonnan serio a tuma lugá. Bandanan a trein sin fin, perfekshonando e komposishon musikal pa un kantante ku a deseá di keda koroná "Rei di Tumba." Sèn ta skeiru preparando pa gran marcha. Hende ku mester lamta tempran bai traha, ta bezig te madrugá ku karosanan i trahenan eksótiko di kolónan briante.

Komo ku karnaval ta eksigí tantu esfuerso i atenshon, lo ta bon pa nos evaluá e filosofia riba kua e fiesta aki ta basá. Pa hasi esaki, nos ta bai bèk na su orígen na Roma antiguo.

Segun mitología romano, un lobo a reskatá e ohochinan beibi Romulus i Remus (fundadónan di Roma). El a kuida nan den e kueba yamá Lupercal situá den un di e shete serunan unda Roma a wòrdu konstruí na 753 B.C. Pa konmemorá esaki, e romanonan a selebrá "Lupercalia," un fiesta religioso, dia 15 di febrüari. Durante e fiesta, saserdotenan a sakrifiká un kachó i vários kabritu den e kueba Lupercal. Di e kueru di e kabritunan sakrifiká, e saserdotenan a traha zuipnan. Dos hóben a kore tras di e hende muhé i suta nan, keriendo ku esnan ku zuip alkansá lo bira fertil. E dia liber a degenerá bira un fiesta hidonista. Komo ku mayoria lei a keda suspendé pa e selebrashon, suidadanonan desfrasá a hasi tur klase di chansa i immoralidat sin temor di ser rekonosé i sufri represalia.

Na aña 600 A.D., papa Gregorio a legitimá Lupercalia i a pon'é promé ku Djarason di Shinishi. Meta di e fiesta tabata pa hende sasia nan deseonan promé ku Kuaresma. Hopi hende a probechá di e fiesta libertino promé ku nan a sakrifiká "tur deseo di karni" pa 40 dia di penitensia.

Ta parse ku hulandesnan di provinsianan di Brabant i Limburg a trese karnaval aki ora nan a kolonialisá nos islanan. Sobrá di historia di karnaval na nos isla ta konosí.

Kon Dios ta evaluá e filosofia tras di e fiesta aki?

Karnaval ta basá riba e idea ku bo mester sasia deseonan karnal pa bo por hiba un bida penitente durante Kuaresma. E impreshon ta ku eventualmente bo mester gratifiká deseonan karnal. Si bo no sasia nan promé ku Kuaresma, difísilmente bo por keda sin hasié durante e temporada di penitensia. Pa prevení piká durante Kuaresma, mihó djòdjò bai gol durante karnaval. E konsepto ei ta kontradisí Beibel.

For di e filosofia falsu ei por dedusí un otro mentira ku no ta kuadra ku Skritura, es ta, ku sierto fecha piká ta legítimo. Dios no a fiha sierto dia ku ta pèmití bebe burachi òf kometé aktonan immoral...ku "beibinan di karnaval" ta nase na òktobèr òf novèmbèr. E karosanan por ta bunita. E disfras por ta creativo. Ma e parandiamentu ta piká mahós den bista di Dios. Segun Beibel, **loke ta piká awe, ta keda piká mañan. No tin eksepsion pa dia di karnaval.**

Hopi hende ta gosa piká durante karnaval, keriendo ku Dios tòg lo pordoná nan. Ma Dios a bisa "...si Mi pueblo..umiyá nan mes i hasi orashon, i buska Mi kara i bira for di nan mal kamindanan, e ora ei lo Mi tende for di shelu i lo pordoná nan piká..." (2 Kronikanan 7:14).

Dios, ku sa tur kos, ta pordoná esnan ku ta "bandoná nan mal kamindanan"...no hende ku durante karnaval ta ignorá Dios Su stèndertnan. Hende asina ta **posponé** piká; nan no tin intenshon di **bandoná** piká!

Dios ta pordoná esun ku ta atmití ku e ta un pekador ku ta meresé fièrnu, ta bira lomba pa su piká i ta konfia Hesu-Kristo so pa salb'é di e kastigu ku su piká ta meresé. Bo tambe por haña Dios Su pordon awor mes si bo hasi esei.